

Date – 29/08/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. A mamawhtute hna a thlawna mit pek leh hemi chungchanga inzirtirna hapta hnih aw h tur -"Eye Donation Fortnight" chu vawiin khan hawn a ni.
2. Ramchhung hmun dang rualin vawiin khan Mizoramah National Sports day hman a ni.
3. Election Commission of India chuan vawiin khan Jammu and Kashmir Assembly inthlan thawh hnihna atana hriattirna a ti chhuak
4. WHO chuan Nepal-a Dhulikhel khawpui chu khawpui hrisel 'healthy city' ah a puang.

<><><>

EYE DONATION FORTNIGHT

A mamawhtute hna a thlawna mit pek leh hemi chungchanga inzirtirna hapta hnih aw h tur -"Eye Donation Fortnight" chu vawiin khan Aizawl Health Directorate Office-ah hawn a ni a. Hei bakah hian DHS leh DHME Staff te tan a thlawna mit entirna free Clinic buatsaih nghal a ni.

Vawiina Eye Donation Fortnight puala hun buatsaih hi National Programme for Blindness & Visual Impairment bultuma neih a ni a. NHM Mission Director Dr.Eric Zomawian kaihruiin Health Services Director Dr. Lalremmawiin a hmanpui a ni.

Aizawl Civil Hospital Eye Donation Counsellor Mimi Zodinthari tarlan danin Kum 2008 July ni 12 atanga nimin thlenga mit pe thei tura in register zat hi mi 8982 an ni a, Mitdel mit thlak ngai in-register hi mi 362 awm tawhin Corneal Transplant tawh zawng zawng 502 an awm tawh bawh. Mit lak tawh zawng zawng hi tun dinhmunah 1130 awm tawhin mit pe tawh zat hi tun dinhmunah mi 568 an ni.

He fortnight hun chung hian Radio leh Cable TV lamah Eye Donation chungchang inzirtirna hun uar taka hman chhoh zel a ni ang.

<><><>

OPERATION GINGER @ KOLASIB

Mizoram Sorkarin tun August thla atana a kalpui mek, Sawhthing tam tur venna beihpui thlakna 'Operation Ginger Feh chhuah Run pui' chu Kolasib Horticulture Division bik tan vawiin chawhma khan Kolasib DHO Office Conference Hall-ah neih a ni.

He huna thusawitu Pu Lalnunpuia, District Horticulture Officer chuan, kuthnathawktuten an thawhrim rah hlawk zawka an tel theihna turin sorkar chuan theihtawp a chhuah mek thu a sawi a, sorkar policy pawimawh tak- 'Bana kaih' tih chu chhawr tangkai tum theuh turin kalkhawmte a chah.

Pu Henry L. Varte, Addl DHO, Kolasib pawhin thusawiin, Kolasib khaw chhung veng hrang hranga sawhthing chingtu kalkhawmte chu sawhthing tàm tur ven dan, enkawl leh leh hlawk zawka thar dan chungchang a zirtir bawk.

Wawiina Operation Ginger Feh chhuah Run pui ah hian Kolasib khaw chhung veng hrang hranga Sawhthing chingtu kuthnathawktu 31 an tel a. Kolasib khaw chhunga Sawhthing chingtute puala training neih hma hian Kolasib District chhunga khaw hrang hranga Sawhthing chingtu 351 te hnenah training pek a lo ni tawh a ni.

Kolasib Division Horticulture department-a thawktuten an tarlan danin, Kolasib District-ah hian Sawhthing chingtu chhungkaw 806 te chuan Tin 1,006.45 a zau ah Sawhthing Quintal 1,861.23 an ching a, heta tang hian Quintal 13,563.32 thar beisei ani a, hetih lai hian Mizo Aieng chingtu chhungkaw 449 te chuan Tin 593.85 a zau ah Aieng Quintal 673.64 ching in, Quintal 4749.80 thar beisei a ni.

Kolasib District ah vek hian kumin ah Mizo Hmarcha chingtu chhungkaw 293 te chuan Tin 384.8 a zau ah Quintal 13.355 an ching a, heta tang hian Quintal 1084.3 thar chhuah beisei a ni bawk.

<><><>

NATIONAL SPORTS DAY

Ramchhung hmun dang rualin vawiin khan Mizoramah National Sports day hman a ni a, Mizoramah a lawmna pui ber chu Sports Authority of India (SAI) State Training Centre, Mission Vengthlang-ah hman a ni. National Sports Day-ah hian thupui atan “Sports for the promotion of Peaceful and inclusive societies “ tih a ni.

Sports & Youth Services Secy Pu Lalramsanga Sailo chuan hmanpuiin Sports chu mihringte indaidan na thiattu, remna leh inpumkhatna atan hmanrua pawimawh a ni a ti a. Hriselna leh infiamna chu thil kalkawp tlat niin, mimal invawn nan, ruihhlo do nan leh rilru lam harsatna te hneh nan a tangkai thu a sawi a. Vision Olympic 2036 kalpui chhoh mek niin Sports lama thawktu zawng zawngte tangrual turin a sawm a ni.

He hunah hian taksa hrisel nan nitin darkar chanve tal taksa sawizawi thin turin kal khawmte hi an intiam a ni.

Infiamna chi hrang hrang, mini marathon leh indigenous games tel in hun hman chhun zawm nghal a ni.

He hunah hian sports leh community service activities te School Education Department hnuai School hrang hrangah te, College hrang hrangah te, NCC te, NSS te, District hrang hranga Sports & Youth office-ahte, Khelo India Centre (KIC) District hrang hrangah te hman a ni bawk.

Kolasib Saidan a Regional Sports Training Centre (RSTC) ah National Sports Day pualin hun hman a ni bawk a.

He hun hi Olympian Ni Lalremsiami leh Pu S. Malsawmtluanga International Footballer ten an hmanpui a. He hun hmanpuitu Pu S. Malsawmtluanga chuan football zirlai naupangte chu taimakna, thuawihna leh teirei peihna nun nei tur leh, he Centre-a an hotu te leh nitin school-a an

zirtirtu te thuawih tura chahin, nu leh pa leh aia upa te zah thiam turin a chah a ni.

Kolasib Saidana RSTC-ah hian Under-16 leh Under-17 mipa naupangten football an zir mek a ni.

National Sports Day hi India Hockey thiam Maj. Dyan Chand-a hriatreng nan leh a piancham pualin kum 2012 atang khan kumtin hman thin a ni.

<><><>

TOURISM

Mizorama sumdawwna atana mikhual zan riak a thlenna nei reng reng te chu Tourism Department-a inziak lut vek tura hriattir an ni a.

Tourism Department hotute sawi danin hotel, homestay, guesthouse leh restaurant nei te chu Tourism Department-ah inziah luh vek a ngaih tawh thu an sawi a, sorkar thuchhuak zawm lo man chhuah an awm a nih chuan Mizoram Sorkar Dan siam “The Mizoram Registration Of Tourist Trade Act 2020” na tlawhchhana cheng sing nga thleng chawi tir theih an ni.

Tourism Department hotuten Akashvani Correspondent-an hrih danin kum 2023 atanga 2024 chhunga ram pawn atanga Mizoram a khualzin lo lut zat chu an chhinchhiah theih chinah mi 20,938 an tling tawh a, India khua leh tui, Mizoram hmuh chak a khual fang zin a rawn zin pawh mi nuai 1 sing 5 & 4,864 an tlin tawh thu an sawi bawk.

<><><>

CASE REGISTERED UNDER BNS

Sorkar laipuiin thil sual ti tute hremna dan thar a zam, Bharatiya Nyaya Sanhita July ni 1 atanga hman tan anih hnuah nimin thleng khan Mizoram chhungah thubuai 328 ziah luh a ni tawh.

Bharatiya Nyaya Sanhita hnuaiah hian Mizoramah chuan he dan thar hman tan ni, July ni 1 khan Champhai Police Station-ah case hmasa ber ziah luh a ni a, dan tharin a phut angin, Police Station tin a FIR ziah luh reng rengte chu Crime and Criminal Tracking Network and System (CCTNS) hnuaiah fel fai taka chhinchhiah thin an ni a, he hian Police te hnuchhui kawnga an hnathawh pawh nasa lehzualin a tih chak phah a ni.

<><><>

LUNGLEI RATION CARD

Lunglei District ah ration card endik mek a ni a,

Lunglei DCSO Pu Lalremruata Ralte chuan Ration Card dik leh fel tak a awm theih nan hmalak mek zel a ni tih sawiin, ration card atanga mitthi tawhte mi 500 vel hming an paih tawh a, mithi hming paih tur hian theihtawpa fimkhur a hma an lak thu leh mitthi hming paih tak te hmun ruakah mi eng emaw zat ration buhfai mamawh te thun luh theih tur thu a sawi a, a then phei chu Ration card var-ah te pawh an awm phah ngei a beisei awm thu a sawi a ni.

Hetihlai hian thla 6 chhung Ration card hmanga buhfai khul tawh lo te report tura retailer tin te an hriattir angin tun dinhmunah Ration card endik mek a ni a. Lunglei DCSO sawi danin Lunglei District chhung bikah Sorkar Officer lian, ration card hmanga buhfai lak mamawh lo, NER Card hmang mi 7 in report an awm tawh a ni.

Buhfai buk dik tak mipui ten an lak theih nan theih ang tawka hmalak mek zel a ni tih sawiin Retailer ten Public Distribution Center Lunglei Luangmual atanga an buhfai lak chu Digital Weighing Scale hmanga teh tur a kalpui a nih thu leh he digital hmanga buhfai bukna hi hmun thenkhatah chuan an hman tawh thu a sawi bakah hei hi a remchan dan ang in hman zel tum a nih thu leh Digital Weighing Scale te deuh chi quintal 3 zo thei tur pawh PDC thenkhatah hman theih tura hmalak mek a nih thu a sawi bawk.

<><><>

KHAWZAWL PLASTIC

Khawzawl khaw chhungah hman khat daih sarang zawrh leh hman a awm leh awm loh chu sawi lawk awm lovin vawiin khan endik a ni a,

SDO Sadar Pu Vabeimozachhi Chozah hova neih a ni a, Khawzawl khaw chhunga dawr hrang hrangah hman khat daih polythene leh plastic engemawzat an man a ni.

Khawzawl SDO Sadar chuan District Magistrate thupek anga he hmalakna hi kalpui a nih thu a sawi bakah a khat tawk a endikna hi kalpui a nih thin tur thu a sawi a, khawvel tichhe thei thil, hman khat daih polythene leh plastic zawrh khap a nih angin dawrkai te leh mipuite'n hman lo hram se a duh tih a sawi bawk.

Khawzawl khaw chhunga Single Use Plastic endikna-ah hian UD&PA office, DC Office leh Trade & Commerce leh Mizoram Polution Control Board aiawh te an tel a ni.

<><><>

MAMIT

Tunhnai ruahsur nasat avangin Kum 2010 September ni 20 a Mamit Bazar venga leithlahniam chu che leh in chhungkaw 2 te chuan an chenna in chu luahzui ngamlovin vawiin khan Mamit Disaster cell thurawn angin an chhuahsan.

Leikhi hi vawiin chhun ruahsur tawh loh hnu thleng khan a chet belh zel a, leikhi avang hian In bang te pawh keh tawhin inhnuai ban leh beam te pawh a khik tawh bakah in chhung tukverh te pawh khar theih loin a awm tawh a ni. Leikhi hi hmun thenkhat laiah chuan feet chanve velin a tlahniam tawh a ni.

In hi pu Lalrinchhana Hrahseel chhungkaw member 4 leh Pu Lalchhuanawma chhungkaw member 3 te luahlai a ni a, heng chhungkaw 2 te hi an thenawm hnaivaiah an in vawmlut a ni.

<><><>

J&K ELECTION

Election Commission of India chuan vawiin khan Jammu and Kashmir Assembly inthlan thawh hnihna atana hriattirna a ti chhuak a. Vawiin atangin inthlan chuh tumte tan hming pekluh hun hawn nghal a ni a. Thlaleh ni 5 thleng hun hawn a ni ang a, a tuk ni 6 ah nomination paper te hi endik a ni ang. Inhnukdawk duh tna September ni 9 thleng hun hawn a ni a, September ni 25 ah vote thlak a ni ang. J&K Assembly inthlan thawh hnihnaah hian district 6 huamchhunga Assembly bial 25 ah inthlan a ni ang a. Heng district te hi Ganderbal, Srinagar, Budgam, Rajouri, Poonch leh Reasi te an ni a. October ni 4 ah vote chhiar a ni ang. .

<><><>

NEPAL HEALTHY CITY

WHO chuan Nepal-a Dhulikhel khawpui chu khawpui hrisel 'healthy city' ah a puang. Dulikhel khawpui hi Nepal khawpui zingah hetiang dinhmun thleng hmasa ber niin Asia-a khawpui hrisel ber dawttu a ni nghal bawk a. Kum 2014 atang khan Dhulikhel Municipality chuan programme hrang hrang kalpuiin tun dinhmun thleng tur hian hma an la a ni.

WHO chuan Dhulikhel khawpui hi kum 2021 atang khan an lo vil tawh a. WHO Healthy cityNetwork zawm ve in tehna hrang hrangah point 65.48 a hmu a ni. Khawpui hrisel endik nan hian hriselna lama policy an siamte, mipuiten inenkawlina an dawn that dante, politics lamin health lama an hnathawhte, nutrition, naupang hriselna leh hmathar lak dan zawng zawngte endik a ni.

<><><>

GUJARAT FLOOD

Gujarat tuilian tuarte chhawmdawl hna ngawrh taka thawh mek a ni. State laili leh chhim lamahte chuan ruahsur a ziaawm tawh a, Suarashtra leh Kutch ah erawh ruah a la sur nia thudawn a ni.

Prime Minister Narendra Modia chuan Chief Minister Bhupendra Patel chu telephone hmanga biain an dinhmun a zawt a. CHhanchhuahna leh chhawmdawl hna thawh dante a zawt bawk a. Pu Modia chuan sawrkar laipuiin theihtawpa a puih tur thu a hrilh a ni.

<><><>